

摘藻堂四庫全書薈要

史部

欽定四庫全書薈要

史部
唐書卷七十六

詳校官編修臣王天祿



欽定四庫全書薈要卷五千二百十六

史部

唐書卷七十六

宋端明殿學士宋祁撰

列傳第一

后妃上

唐制皇后而下有貴妃淑妃德妃賢妃是為夫人昭儀
昭容昭媛脩儀脩容脩媛充儀充容充媛是為九嬪婕
妤美人才人各九合二十七是代世婦寶林御女采女

各二十七合八十一是代御妻自餘六尚分典乘輿服御皆有員次後世改復不常開元時以后下復有四妃非是乃置惠麗華三妃六芳儀四美人七才人而尚宮尚儀尚服各二參合前號大抵踵周官相損益云然則尚矣禮本夫婦詩始后妃治亂因之興亡係焉盛德之君帷薄嚴奧裏謁不忤于朝外言不內諸閭闢睢之風行彤史之化脩故淑範懿行更為內助若夫豔嬖之興常在主第稠旣交則情與愛遷顏辭媚熟則事為私奪

乘易昏之明牽不斷之柔險言似忠故受而不詰醜行
已效反徇而為好左右附之儉壬基之狡謀鉗其悟先
哀誓捷於寵初天下之事已去而恬不自覺此武韋所
以遂篡弑而喪王室也至於楊氏未死玄亂厥謀張后
制中肅幾歛衽吁可嘆哉中葉以降時多故矣外有攻
討之勤內寡嫵弱之私羣閹朋進外戚勢分后妃無大
善惡取充職位而已故列著于篇

高祖太穆順聖皇后竇氏京兆平陵人父毅在周為上

柱國尚武帝姊襄陽長公主入隋為定州總管神武公
后生髮垂過頸三歲與身等讀女誡列女等傳一過輒
不忘武帝愛之養宮中異它甥時突厥女為后無寵后
密諫曰吾國未靖虜且強願抑情撫接以取合從則江
南關東不吾梗武帝嘉納及崩哀毀同所生聞隋高祖
受禪自投牀下曰恨我非男子不能捄舅家禍殺遽掩
其口曰毋妄言赤吾族常謂主曰此女有奇相且識不
凡何可妄與人因畫二孔雀屏間請昏者使射二矢陰

約中目則許之射者閱數十皆不合高祖最後射中各
一目遂歸於帝始元貞太后羸老有疾而性素嚴諸姒
娣皆畏莫敢侍后事之獨怡謹盡孝或淹月不釋衣履
工為篇章規誡文有雅體又善書與高祖書相雜人不
辨也崩於涿郡年四十五帝在煬帝時多畜善馬后見
曰上性樂此盍以獻徒留之速罪無益也不聽頃果坐
譴帝後見隋政亂多妄誅殛乃為自安計數奏鷹犬異
駒煬帝果喜擢位將軍因泣謂諸子曰早用而母言得

此久矣帝有天下詔即所葬園為壽安陵謚曰穆及祔
獻陵尊為太穆皇后始太宗生有二龍之符后於諸子
中愛視最篤後即位過慶善宮覽觀梗欵顧侍臣曰朕
生於此今母后永違育我之德不可報因號慟左右皆
流涕乃享后于正寢宅日幸九成宮夢后若平生既悟
潸然不自勝明日詔有司大發倉賑貧瘠以為后報焉
上元中益謚太穆神皇后

太宗文德順聖皇后長孫氏河南洛陽人其先魏拓拔

氏後為宗室長因號長孫高祖稱大丞相馮翊王曾祖
裕平原公祖兕左將軍父晟字季涉書史趨驚曉兵仕
隋為左驍衛將軍后喜圖傳視古善惡以自鑒矜尚禮
法晟兄熾為周通道館學士嘗聞太穆勸撫突厥女心
誌之每語晟曰此明睿人必有奇子不可以不圖昏故
晟以女太宗后歸寧舅高士廉妾見大馬二丈立后舍
外懼占之遇坤之泰卜者曰坤順承天載物无疆馬地
類也之泰是天地交而萬物通也又以輔相天地之宜

絲協歸妹婦人事也女處尊位履中而居順后妃象也

時隱太子釁閱已構后內盡孝事高祖謹承諸妃消釋
嫌疑及帝授甲宮中后親慰勉士皆感奮尋為皇太子
妃俄為皇后性約素服御取給則止益觀書雖容櫛不
少廢與帝言或及天下事辭曰牝雞司晨家之窮也可
乎帝固要之訖不對後廷有被罪者必助帝怒請繩治
俟意解徐為開治終不令有冤卞嬪生豫章公主而死
后視如所生媵侍疾病輟所御飲藥資之下懷其仁兄

無忌於帝本布衣交以佐命為元功出入臥內帝將引以輔政后固謂不可乘間曰妾託體紫宮尊貴已極不願私親更據權于朝漢之呂霍可以為誡帝不聽自用無忌為尚書僕射后密諭令牢讓帝不獲已乃聽后喜見顏間異母兄安業無行父喪逐后無忌還外家后貴未嘗以為言擢位將軍後與李孝常等謀反將誅后叩頭曰安業罪死無赦然向遇妾不以慈戶知之今論如法人必謂妾釋憾於兄無乃為帝累乎遂得減流越雋

太子承乾乳媪請增東宮什器后曰太子患無德與名器何請為從幸九成宮方屬疾會柴紹等急變聞帝甲而起后興疾以從宮司諫止后曰上震驚吾何自安疾稍亟太子欲請大赦汎度道人被塞災會后曰死生有命非人力所支若脩福可延吾不為惡使善無效我尚何求且赦令國大事佛老異方教耳皆上所不為豈宜以吾亂天下法太子不敢奏以告房玄齡玄齡以聞帝嘆美而羣臣請遂赦帝既許后固爭止及大漸與帝訣

時玄齡小譴就第后曰玄齡久事陛下預奇計祕謀非大故願勿置也妾家以恩澤進無德而祿易以取禍無屬樞柄以外戚奉朝請足矣妾生無益於時死不可以厚葬願因山為壠無起墳無用棺槨器以瓦木約費送終是妾不見忘也又請帝納忠容諫勿受讒省遊畋作役死無恨崩年三十六后嘗采古婦人事著女則十篇又為論斥漢之馬后不能檢抑外家使與政事乃戒其車馬之侈此謂開本源恤末事常誠守者吾以自檢故

書無條理勿令至尊見之及崩宮司以聞帝為之慟示
近臣曰后此書可用垂後我豈不通天命而割情乎顧
內失吾良佐哀不可已已謚曰文德葬昭陵因九峻山
以成后志帝自著表序始末揭陵左上元中益謚文德
聖皇后

太宗賢妃徐惠湖州長城人生五月能言四歲通論語
詩八歲自曉屬文父孝德嘗試使擬離騷為小山篇曰
仰幽巖而流盼撫桂枝以凝想將千齡兮此遇荃何為

兮獨往孝德大驚知不可掩於是所論著遂盛傳太宗
聞之召為才人手未嘗廢卷而辭致贍蔚又無淹思帝
益禮顧擢孝德水部員外郎惠再遷充容貞觀末數調
兵討定四夷稍稍治宮室百姓勞怨惠上疏極諫且言
東戍遼海西討崑丘士馬罷耗漕饟漂沒捐有盡之農
趨無窮之壑圖未獲之衆喪已成之軍故地廣者非常
安之術也人勞者為易亂之符也又言翠微玉華等宮
雖因山藉水無築構之苦而工力和飭不謂無煩有道

之君以逸逸人無道之君以樂樂身又言伎巧為喪國

斧斤珠玉為蕩心酖毒侈麗纖美不可以不過志驕於

業泰體逸於時安其剴切精詣大略如此帝善其言優

賜之帝崩哀慕成疾不肯進藥曰帝遇我厚得先狗馬

侍園寢吾志也復為詩連珠以見意永徽元年卒年二

十四贈賢妃陪葬昭陵石室惠之弟齊珣齊珣子堅皆

以學聞女弟為高宗婕妤亦有文藻世以擬漢班氏

高宗廢后王氏并州祁人魏尚書左僕射思政之孫從

祖母同安長公主以后婉淑白太宗以為晉王妃王居東宮妃亦進冊擢父仁祐陳州刺史帝即位立為皇后仁祐以特進封魏國公母柳本國夫人仁祐卒贈司空初蕭良娣有寵而武才人貞觀末以先帝宮人召為昭儀俄與后良娣爭寵更相毀短而昭儀詭險即誣后與母挾媚道蠱上帝信之解魏國夫人門籍罷后舅柳奭中書令李義府等陰佐昭儀以偏言怒帝遂下詔廢后良娣皆為庶人囚宮中后母兄良娣宗族悉流嶺南許

敬宗又奏仁祐無它功以宮掖故超列三事今庶人謀亂宗社罪宜夷宗仁祐應斷棺陛下不窮其誅家止流竄仁祐不宜引庇廕宥逆子孫有詔盡奪仁祐官爵而后及良娣俄為武后所殺改后姓為蟒良娣為梟初帝念后間行至囚所見門禁錮嚴進飲食竇中惻然傷之呼曰皇后良娣無恙乎今安在二人同辭曰妾等以罪棄為婢安得尊稱耶流涕鳴咽又曰陛下幸念疇日使妾死更生復見日月乞署此為回心院帝曰朕即有處

置武后知之促詔杖二人百剔其手足反接投釀甕中
曰令二嫗骨醉數日死殊其尸初詔旨到后再拜曰陛
下萬年昭儀承恩死吾分也至良娣罵曰武氏狐媚翻
覆至此我後為猫使武氏為鼠吾當扼其喉以報后聞
詔六宫毋畜猫武后頻見二人被髮瀝血為厲惡之以
巫祝解謝即徙蓬萊宮厲復見故多駐東都中宗即位
皆復其姓

高宗則天順聖皇后武氏并州文水人父士彥見外戚

傳文德皇后崩久之太宗聞士彘女美召為才人方十四母楊慟泣與訣后獨自如曰見天子庸知非福何兒女悲乎母避其意止泣既見帝賜號武媚及帝崩與嬪御皆為比丘尼高宗為太子時入侍悅之王皇后久無子蕭淑妃方幸后陰不悅它日帝過佛廬才人見且泣帝感動后廉知狀引內後宮以撓妃寵才人有權數詭變不窮始下辭降體事后后喜數譽於帝故進為昭儀一旦顧幸在蕭右寢與后不協后性簡重不曲事上下

而母柳見內人尚宮無浮禮故昭儀伺后所薄必款結之得賜予盡以分遺由是后及妃所為必得得輒以聞然未有以中也昭儀生女后就顧弄去昭儀潛斃兒衾下伺帝至陽為歡言發衾視兒死矣又驚問左右皆曰后適來昭儀即悲涕帝不能察怒曰后殺吾女往與妃讒媚今又爾耶由是昭儀得入其訾后無以自解而帝愈信愛始有廢后意久之欲進號宸妃侍中韓瑗中書令來濟言妃嬪有數今別立號不可昭儀乃誣后與母

馱勝帝挾前憾實其言將遂廢之長孫無忌褚遂良韓
瑗及濟瀕死固爭帝猶豫而中書舍人李義府衛尉卿
許敬宗素險側狙勢即表請昭儀為后帝意決下詔廢
后詔李勣于志寧奉璽綬進昭儀為皇后命羣臣及四
夷酋長朝后肅義門內外命婦入謁朝皇后自此始后
見宗廟再贈士彘至司徒爵周國公謚忠孝配食高祖
廟母楊再封代國夫人家食魏千戶后乃製外戚誠獻
諸朝解釋譏諛於是遂無忌遂良踵死徙寵煥赫然后

城寓深痛柔屈不恥以就大事帝謂能奉已故扳公議
立之已得志即盜威福施施無憚避帝亦懦昏舉能鉗
勒使不得專久稍不平麟德初后召方士郭行真入禁
中為蠱祝宦人王伏勝發之帝怒因是召西臺侍郎上
官儀儀指言后專恣失海內望不可承宗廟與帝意合
乃趣使草詔廢之左右馳告后遽從帝自訴帝羞縮待
之如初猶意其恚且曰是皆上官儀教我后諷許敬宗
構儀殺之初元舅大臣怫旨不閱歲屠覆道路目語及

儀見誅則政歸房帷天子拱手矣羣臣朝四方奏章皆曰二聖每視朝殿中垂簾帝與后偶坐生殺賞罰惟所命當其忍斷雖甚愛不少隱也帝晚益病風不支天下事一付后后乃更為太平文治事大集諸儒內禁殿譔定列女傳臣軌百寮新誠樂書等大抵千餘篇因令學士密裁可奏議分宰相權始士驥娶相里氏生子元慶元爽又娶楊氏生三女伯嫁賀蘭越石蚤寡封韓國夫人仲即后季嫁郭孝慎前死楊以后故寵日盛徙封榮

國始兄子惟良懷運與元慶等遇楊及后禮薄后銜不
置及是元慶為宗正少卿元爽少府少監惟良司衛少
卿懷運淄州刺史它日夫人置酒酣謂惟良曰若等記
疇日事乎今謂何對曰幸以功臣子位朝廷晚緣戚屬
進憂而不榮也夫人怒諷后偽為退讓請惟良等外遷
無示天下私繇是惟良為始州刺史元慶龍州元爽濠
州俄坐事死振州元慶至州憂死韓國出入禁中一女
國姝帝皆寵之韓國卒女封魏國夫人欲以備嬪職難

於后未決后內忌甚會封泰山惟良懷運以岳牧來集
從還京師后毒殺魏國歸罪惟良等盡殺之氏曰蝮以
韓國子敏之奉士護祀初魏國卒敏之入弔帝為慟敏
之哭不對后曰兒疑我惡之俄貶死楊氏徙鄴衛二國
咸亨元年卒追封魯國謚忠烈詔文武九品以上及五
等親與外命婦赴弔以王禮葬咸陽給班劍葆仗鼓吹
時天下旱后偽表求避位不許俄又贈士護太尉兼太
子太師太原郡王魯國忠烈夫人為妃上元元年進號

天后建言十二事一勸農桑薄賦徭二給復三輔地三
息兵以道德化天下四南北中尚禁浮巧五省功費力
役六廣言路七杜讒口八王公以降皆習老子九父在
為母服齊衰三年十上元前勲官已給告身者無追覈
十一京官八品以上益稟入十二百官任事久材高位
下者得進階申滯帝皆下詔略施行之蕭妃女義陽宣
城公主幽掖庭幾四十不嫁太子弘言于帝后怒酖殺
弘帝將下詔遜位于后宰相郝處俊固諫乃止后欲外

示寬裕劫人心使歸已即奏言今羣臣納半俸百姓計口錢以贍邊兵恐四方妄商虛實請一罷之詔可儀鳳三年羣臣蕃夷長朝后于光順門即并州建太原郡王廟帝頭眩不能視侍醫張文仲秦鳴鶴曰風上逆砭血頭可愈后內幸帝殆得自專怒曰是可斬帝體寧刺血處耶醫頓首請命帝曰醫議疾烏可罪且吾眩不可堪聽為之醫一再刺帝曰吾目明矣言未畢后簾中再拜謝曰天賜我師身負繒寶以賜帝崩中宗即位天后稱

皇太后遺詔軍國大務聽參決嗣聖元年太后廢帝為
廬陵王自臨朝以睿宗即帝位后坐武成殿帝率羣臣
上號冊越三日太后臨軒命禮部尚書攝太尉武承嗣
太常卿攝司空王德真冊嗣皇帝自是太后常御紫宸
殿施慘紫帳臨朝追贈五世祖後魏散騎常侍克已為
魯國公妣裴即其國為夫人高祖齊殷州司馬居常為
太尉北平郡王妣劉為王妃曾祖永昌王諮議參軍贈
齊州刺史儉為太尉金城郡王妣宋為王妃祖隋東郡

丞贈并州刺史大都督華為太尉太原郡王妣趙為王妃皆置園邑戶五十考為太師魏王加實戶滿五千妣為王妃王園邑守戶百時睿宗雖立實囚之而諸武擅命又謚魯國公曰靖裴為靖夫人北平郡王曰恭肅金城郡王曰義康太原郡王曰安成妃從夫謚太后遣冊武成殿使者告五世廟室於是柳州司馬李敬業括蒼令唐之奇臨海丞駱賓王疾太后脅逐天子不勝憤乃募兵殺揚州大都督府長史陳敬之據州欲迎廬陵王

衆至十萬楚州司馬李崇福連和盱眙人劉行舉嬰城不肯從敬業攻之不克太后拜行舉游擊將軍擢其弟行實楚州刺史敬業南度江取潤州殺刺史李思文曲阿令尹元貞拒戰死太后詔左玉鈴衛大將軍李孝逸為揚州道行軍大總管率兵三十萬討之戰于高郵前鋒左豹韜果毅成三朗為唐之奇所殺又以左鷹揚衛大將軍黑齒常之為江南道行軍大總管并力敬業興三月敗傳首東都三州平始武承嗣請太后立七廟中

書令裴炎沮止及敬業之興下炎獄殺之并殺左威衛大將軍程務挺太后方怫恚一日召羣臣廷讓曰朕於天下無負若等知之乎羣臣唯唯太后曰朕輔先帝踰三十年憂勞天下爵位富貴朕所與也天下安佚朕所養也先帝棄羣臣以社稷為託不敢愛身而知愛人今為戎首者皆將相何見負之遽且受遺老臣仇讎難制有若裴炎乎世將種能合亡命若徐敬業乎宿將善戰若程務挺乎彼皆人豪不利於朕朕能戮之公等才有

過彼蚤為之不然謹以事朕無詒天下笑羣臣頓首不敢仰視曰惟陛下命久之下詔陽若復辟者睿宗揣非情固請臨朝制可乃治銅匭為一室署東曰延恩受干賞自言南曰招諫受時政失得西曰申冤受抑枉所欲言北曰通玄受讖步祕策詔中書門下一官典領太后不惜爵位以籠四方豪傑自為助雖妾男子言有所合輒不次官之至不稱職尋亦廢誅不少縱務取實材真賢又畏天下有謀反逆者詔許上變在所給輕傳供五

品食送京師即日召見厚餌爵賞歆動之凡言變吏不得呵詰雖耘夫莠子必親延見稟之客館敢稽若不送者以所告罪之故上變者徧天下人人屏息無敢議新豐有山因震突出太后以為美祥赦其縣更名慶山荆人俞文俊上言人不和疣贅生地不和堆阜出今陛下以女主處陽位山變為災非慶也太后怒投嶺外詔毀乾光殿為明堂以浮屠薛懷義為使督作懷義鄴人本馮氏名小寶偉岸淫毒佯狂洛陽市千金公主嬖之主

上言小寶可入侍后召與私悅之欲掩迹得通籍出入
使祝髮為浮屠拜白馬寺主詔與太平公主壻薛紹通
昭穆紹父事之給廐馬中官為騶侍雖承嗣三思皆尊
事惟謹至是護作士數萬巨木率一章千人乃能引又
度明堂後為天堂鴻麗巖奧次之堂成拜左威衛大將
軍梁國公始作崇先廟于西京享武氏承嗣偽款洛水
石導使為帝遣雍人唐同泰獻之后號為寶圖擢同泰
游擊將軍於是汜人又上瑞石太后乃郊上帝謝貺自

號聖母神皇作神皇璽改寶圖曰天授聖圖號洛水曰永昌水圖所曰聖圖泉勒石洛壇左曰天授聖圖之表改汜水曰廣武時柄去王室大臣重將皆撓不得逞宗室孤外無寄足地於是韓王元嘉等謀舉兵唱天下迎還中宗琅邪王沖越王貞先發諸王倉卒無應者遂敗元嘉與魯王靈夔等皆自殺餘悉坐誅諸王牽連死滅殆盡子孫雖嬰祿亦投嶺南太后身拜洛受圖天子率太子羣臣蠻夷以次列大陳珍禽奇獸貢物鹵簿壇下

禮成去永昌元年享萬象神宮改服袞冕搢大圭執鎮圭睿宗亞獻太子終獻合祭天地五方帝百神從以高祖太宗高宗配引魏王士彛從配班九條訓百官遂大饗羣臣號士彛周忠孝太皇楊忠孝太后以文水墓為章德陵咸陽墓為明義陵太原安成王為周安成王金城郡王為魏義康王北平郡王為趙肅恭王魯國公為太原靖王載初中又享萬象神宮以太穆文德二皇后配皇地祇引周忠孝太后從配作罍而饗○圉○風○思

虞鳳垂十有二文太后自名嬰改詔書為制書以周漢為二王後虞夏殷後為三恪除唐屬籍拜薛懷義輔國大將軍封鄂國公令與羣浮屠作大雲經言神皇受命事春官尚書李思文詭言周書武成為篇辭有垂拱天下治為受命之符后喜皆班示天下稍圖革命然畏人心不肯附乃陰忍鷙害肆斬殺怖天下內縱酷吏周興來俊臣等數十人為爪吻有不慊若素疑憚者必危法中之宗姓侯王及它骨體臣將相駢頸就缺血丹狴

戶家不能自保太后操奩具坐重幃而國命移矣御史
傅游藝率關內父老請革命改帝氏為武又脅羣臣固
請妄言鳳集上陽宮赤雀見朝堂天子不自安亦請氏
武示一尊太后知威柄在已因大赦天下改國號周自
稱聖神皇帝旗幟尚赤以皇帝為皇嗣立武氏七廟于
神都尊周文王為文皇帝號始祖妣曰文定皇后武
王為康皇帝號睿祖妣姜曰康惠皇后太原靖王為成
皇帝號嚴祖妣曰成莊皇后趙肅恭王為章敬皇帝號

肅祖妣曰章敬皇后魏義康王為昭安皇帝號烈祖妣
曰昭安皇后祖周安成王為文穆皇帝號顯祖妣曰文
穆皇后考忠孝太皇為孝明高皇帝號太祖妣曰孝明
高皇后罷唐廟為享德廟四時祠高祖以下三室餘廢
不享至日祀上帝萬象神宮以始祖及考妣配以百神
從祀盡王諸武詔并州文水縣為武興比漢豐沛百姓
世給復以始祖冢為德陵睿祖為喬陵嚴祖為節陵肅
祖為簡陵烈祖為靖陵顯祖為永陵章德陵為昊陵明

義陵為順陵太后雖春秋高善自塗澤雖左右不悟其
衰俄而二齒生下詔改元為長壽明年享神宮自制大
樂舞工用九百人以武承嗣為亞獻三思為終獻帝之
為皇嗣公卿往往見之會尚方監裴匪躬左衛大將軍
阿史那元慶白澗府果毅薛大信監門衛大將軍范雲
僊潛謁帝皆腰斬都市自是公卿不復上謁有上封事
言嶺南流人謀反者太后遣攝右臺監察御史萬國俊
就按得實即論決國俊至廣州盡召流人矯詔賜自盡

皆號哭不服國俊驅之水曲使不得逃一日戮三百餘人乃誣奏流人怨望請悉除之於是太后遣右衛翊府兵曹參軍劉光業司刑評事王德壽苑南面監丞鮑思恭尚輦直長王大貞右武衛兵曹參軍屈貞筠皆攝監察御史分往劔南黔中安南等六道訊鞠而擢國俊左臺侍御史光業等亦希功于上惟恐殺人之少光業殺者九百人德壽殺七百人其餘亦不減五百人太后久乃知其冤詔六道使所殺者還其家國俊等亦相踵而

死皆見有物為厲云太后又自加號金輪聖神皇帝置
七寶于廷曰金輪寶曰白象寶曰女寶曰馬寶曰珠寶
曰主兵臣寶曰主藏臣寶率大朝會則陳之又尊其顯
祖為立極文穆皇帝太祖為無上孝明皇帝延載二年
武三思率蕃夷諸酋及耆老請作天樞紀太后功德以
黜唐興周制可使納言姚璿護作乃大裒銅鐵合冶之
署曰大周萬國頌德天樞置端門外其制若柱度高一
百五尺八面面別五尺治鐵象山為之趾負以銅龍石

鏡怪獸環之柱顛為雲蓋山大珠高丈圍三之作四蛟
度丈二尺以承珠其趾山周百七十尺度二丈無慮用
銅鐵二百萬斤乃悉鏤羣臣蕃酋名氏其上薛懷義寵
稍衰而御醫沈南璆進懷義失望因火明堂太后羞之
掩不發懷義愈狠恣怏怏乃密詔太平公主擇健婦縛
之殿中命建昌王武攸寧將作大匠宗晉卿率壯士擊
殺之以畚車載尸還白馬寺懷義負幸昵氣蓋一時出
百官上其徒多犯法御史馮思勗劾其姦懷義怒遇諸

道左左右毆之幾死弗敢言默啜犯塞拜新平伐逆朔
方道大總管提十八將軍兵擊胡宰相李昭德蘇味道
至為之長史司馬後厭入禁中陰募力少年千人為浮
屠有逆謀侍御史周矩劾狀請治驗太后曰第出朕將
使詣獄矩坐臺少選懷義怒馬造廷直往坐大榻上矩
召吏受辭懷義即乘馬去矩以聞太后曰是道人素狂
不足治力少年聽窮劾矩悉投放醜裔懷義構矩俄免
官太后祀天南郊以文王武王士彘與唐高祖並配太

后加號天冊金輪聖神皇帝遂封嵩山禪少室冊山之
神為帝配為后封壇南有大榭蔽日置雞其杪賜號金
雞樹自制升中述志刻石示後改明堂為通天宮鑄九
州鼎各位其方列廷中又歛天下黃金作大儀鍾不克
久之以崇先廟為崇尊廟禮視太廟旋復崇尊廟為太
廟自懷義死張易之昌宗得幸乃置控鶴府有監有丞
及主簿錄事等監三品以易之為之太后自見諸武王
非天下意前此中宗自房州還復為皇太子恐百歲後

為唐宗室躡藉無死所即引諸武及相王太平公主誓
明堂告天地為鐵券使藏史館改吳陵署為攀龍臺久
視初以控鶴監為天驥府又改奉宸府罷監為令以左
右控鶴為奉宸大夫易之復為令神龍元年太后有疾
久不平居迎仙院宰相張柬之與崔玄暉等建策請中
宗以兵入誅易之昌宗於是羽林將軍李多祚等帥兵
自玄武門入斬二張于院左太后聞變而起桓彥範進
請傳位太后返卧不復語中宗於是復即位徙太后上

陽宮帝率百官詣觀風殿問起居後率十日一詣宮俄
朝朔望廢奉宸府宮遷東都武氏廟于崇尊廟更號崇
恩復唐宗廟諸武王者咸降爵是歲后崩年八十一遺
制稱則天大聖皇太后去帝號諡曰則天大聖后祔乾
陵會武三思烝韋庶人復用事於是大旱祈陵輒雨三
思誅帝詔崇恩廟祠如太廟齋郎用五品子博士楊孚
言太廟諸郎取七品子今崇恩取五品不可帝曰太廟
如崇恩可乎孚曰崇恩太廟之私以臣準君則僭以君

準臣則惑乃止及韋武黨誅詔則天大聖皇后復號太
后廢崇恩廟及陵景雲元年號大聖太后太平公主奸
政請復二陵官又尊后曰天后聖帝俄號聖后太平誅
詔黜周孝明皇帝號復為太原郡王后為妃罷吳順等
陵開元四年追號則天皇后太常卿姜皎建言則天皇
后配高宗廟主題天后聖帝非是請易題為則天皇后
武氏制可

中宗和思順聖皇后趙氏京兆長安人祖綽武德中戰

有功終右領軍衛將軍父瓌尚高祖常樂公主帝為英王
聘后為妃高宗於公主恩尤隆武后不喜乃幽妃內侍
省瓌自定州刺史駙馬都尉貶括州絕主朝謁隨瓌之
官妃既囚扃鍵牢謹日給飼料衛者候其突煙數日不
出披戶視之死腐矣瓌以壽州刺史與主預越王事死
神龍元年追謚妃曰恭皇后贈瓌左衛大將軍中宗崩
歲陵事韋庶人不臣不得祔有司加上尊謚以后祔定
陵

中宗庶人韋氏京兆萬年人祖弘表貞觀中曹王府典
軍帝在東宮后被選為妃嗣聖初立為皇后尋與帝處
房陵每使至帝輒恐欲自殺后止曰禍福何常早晚等
死耳無遽及帝復即位后居中宮是時上官昭容與政
事方敬暉等欲盡誅諸武武三思懼乃因昭容入請得
幸於后卒謀暉等誅之初帝幽廢與后約一朝見天日
不相制至是與三思共御床博戲帝從旁典籌不為忤
三思諷羣臣上后號為順天皇后乃親謁宗廟贈父玄

貞上洛郡王左拾遺賈虛已建言非李氏王者盟書共
棄之今復國未幾遽私后家且先朝禍鑒未遠甚可懼
也如令皇后固辭使天下知後宮謙讓不亦善乎不聽
神龍三年節愍太子舉兵敗宗楚客率羣臣請加號翊
聖詔可禁中謬傳有五色雲起后作笥帝圖以示諸朝
因大赦天下賜百官母妻封號太史迦葉志忠表上桑
條歌十二篇言后當受命曰昔高祖時天下歌桃李子太
宗時歌秦王破陣高宗歌側堂堂天后世歌武媚娘皇帝

受命歌英王石州后今受命歌桑條韋蓋后妃之德專
蠶桑共宗廟事也乃賜志忠第一區絹七百段太常少
卿鄭愔因之被樂府楚客又諷補闕趙延禧離釋桑條
為一十八代帝大喜擢延禧諫議大夫於是昭容以武
氏事動后即表增出母服民以二十三為丁限五十九
免五品而上母妻不繇夫子封者喪得用鼓吹數改制
度陰儲人望稍寵樹親屬封拜之昭容與母及尚宮賀
婁等多受金錢封平趙隴西夫人出入禁中勢與上官

埶繇是墨敕斜封出矣三年帝親郊引后亞獻明年正月望夜帝與后微服過市徜徉觀覽縱宮女出游皆淫奔不還國子祭酒葉靜能善禁架常侍馬秦客高醫光祿少卿楊均善烹調皆引入後廷均秦客烝於后嘗喪免不歷旬輒起帝遇弒議者謹咎秦客及安樂公主后大懼引所親議計乃以刑部尚書裴談工部尚書張錫輔政留守東都詔將軍趙承福薛崇簡以兵五百衛譙王重福與兄溫定策立溫王重茂為皇太子列府兵五

萬分二營屯京師然後發喪太子即位是為殤帝皇太后臨朝溫總內外兵檢護宮省族弟濯播宗子捷璿璿甥高崇及武延秀分領左右屯營羽林飛騎萬騎京師大恐傳言且革命播璿入軍中鞭督萬騎欲立威士怨不為用俄而臨淄王引兵夜披玄武門入羽林殺璿播崇於寢斧闢叩太極殿后遁入飛騎營為亂兵所殺斬延秀安樂公主分捕諸韋諸武與其支黨悉誅之梟后及安樂首東市翌日追貶為庶人葬以一品禮

上官昭容者名婉兒西臺侍郎儀之孫父庭芝與儀死武后時母鄭太常少卿休遠之姊婉兒始生與母配掖廷天性韶警善文章年十四武后召見有所制作若素構自通天以來內掌詔命挾麗可觀嘗忤旨當誅后惜其才止黥而不殺也然羣臣奏議及天下事皆與之帝即位大被信任進拜昭容封鄭沛國夫人婉兒通武三思故詔書推右武氏抑唐家節愍太子不平及舉兵叩肅章門索婉兒婉兒曰我死當次索皇后大家矣以激

怒帝帝與后挾婉兒登玄武門避之會太子敗乃免婉

兒勸帝侈大書館增學士員引大臣名儒充選數賜宴
賦詩君臣賡和婉兒常代帝及后長寧安樂二主衆篇
並作而采麗益新又差第羣臣所賦賜金爵故朝廷靡
然成風當時屬辭者大抵雖浮靡然所得皆有可觀婉
兒力也鄭卒謚節義夫人婉兒請降秩行服詔起為婕
妤俄還昭容帝即婉兒居穿沼築巖窮飾勝趣即引侍
臣宴其所是時左右內職皆聽出外不可止婉兒與近

嬖至皆營外宅表人穢夫爭候門下肆狎昵因以求遽
職要官與崔湜亂遂引知政事湜開商山道未半因帝
遺制虛列其功加甄賞韋后之敗斬闕下初鄭方姪夢
巨人昇大稱曰持此稱量天下婉兒生踰月母戲曰稱
量者豈爾邪輒啞然應後內秉機政符其夢云景雲中
追復昭容謚惠文始從母子王昱為拾遺昱戒曰上往
囚房陵武氏得志矣卒而中興天命所在不可幸也三
思雖乘釁天下知必敗今昭容上所信而附之且滅族

鄭以責婉兒不從節愍誅三思果索之始憂懼及草遺制即引相王輔政臨淄王兵起被收婉兒以詔草示劉幽求幽求言之王王不許遂誅開元初哀次其文章詔張說題篇

睿宗肅明順聖皇后劉氏祖德威自有傳儀鳳中帝在藩納為孺人俄為妃生寧王壽昌代國二公主帝即位為皇后會帝降號皇嗣復為妃長壽二年為戶婢誣與竇德妃挾蠱道祝詛武后並殺之宮中葬祕莫知景雲

元年追諡肅明皇后

睿宗昭成順聖皇后竇氏曾祖抗父孝謹皆有傳后婉淑尤循禮則帝為相王納為孺人即位進德妃生玄宗及金仙玉真二公主與肅明同追諡並招魂葬東都之南肅明曰惠陵后曰靖陵立別廟曰儀坤以享云帝崩追稱皇太后與肅明祔橋陵后以子貴故先祔睿宗室肅明以開元二十年乃得祔廟初太常加諡后曰大昭成或言法宜引聖貞冠諡而曰大昭成非也以單言配

之應曰聖昭若睿成以復言配之應曰大聖昭成聖真
昭成又引太穆皇后始謚穆及高祖崩合帝謚曰太穆
追增太穆神皇后文德皇后始謚文德及太宗崩合謚
文德聖皇后又援范曄著漢光烈等為比太常謂曄以
帝號標后謚是史家記事體婦人非必與夫同也入廟
稱后繫夫在朝稱太繫子文母生號也文王既沒謚也
周公豈以夫從婦乎漢法不可以為據制曰可天寶八
載制詔自太穆而下六皇后並增上順聖二謚云

玄宗皇后王氏同州下邳人梁冀州刺史神念之裔孫
帝為臨淄王聘為妃將清內難預大計先天元年立為
皇后久無子而武妃稍有寵后不平顯詆之然撫下素
有恩終無肯譖短者帝密欲廢后以語姜皎皎漏言即
死后兄守一懼為求馱勝浮屠明悟教祭北斗取霹靂
木刻天地文及帝諱合佩之曰後有子與則天比開元
十二年事覺帝自臨劾有狀乃制詔有司皇后天命不
祐華而不實有無將之心不可以承宗廟母儀天下其

廢為庶人賜守一死始后以愛弛不自安承間泣曰陛下獨不念阿忠脫紫半臂易斗麪為生日湯餅邪帝憫然動容阿忠后呼其父仁皎云繇是久乃廢當時王譔作翠羽帳賦諷帝未幾卒以一品禮葬後宮思慕之帝亦悔寶應元年追復后號

玄宗貞順皇后武氏恒安王攸止女幼入宮帝即位寢得幸時王皇后廢故進冊惠妃其禮秩比皇后初帝在潞趙麗妃以倡幸有容止善歌舞開元初父兄皆美官

及妃進麗妃恩亦弛以十四年卒諡曰和生太子瑛而
皇甫德儀生鄂王劉才人生光王皆藩邸之舊後愛薄
而妃乃專寵封所生母楊鄭國夫人弟忠國子祭酒信
祕書監將遂立皇后御史潘好禮上疏曰禮父母讐不
共天春秋子不復讐不子也陛下欲以武氏為后何以
見天下士妃再從叔三思也從父延秀也皆干紀亂常
天下共疾夫惡木垂蔭志士不息盜泉飛溢廉夫不飲
匹夫匹婦尚相擇況天子乎願慎選華族稱神祇之心

春秋宋人夏父之會無以妾為夫人齊桓公誓葵丘曰
無以妾為妻此聖人明嫡庶之分也分定則窺競之心
息矣今人間咸言右丞相張說欲取立后功圖復相今
太子非惠妃所生而妃有子若一儷宸極則儲位將不
安古人所以諫其漸者有以也遂不果立妃生子必秀
疑凡二王一主皆不育及生壽王帝命寧王養外邸又
生盛王咸宜太華二公主後李林甫以壽王母愛希妃
意陷太子鄂光二王皆廢死會妃薨年四十餘贈皇后

及諡葬敬陵

玄宗元獻皇后楊氏華州華陰人曾祖士達為隋納言
天授中以武后母黨追封士達為鄭王父知慶太尉帝
在東宮后以景雲初入宮為良媛時太平公主忌帝而
宮中左右持兩端纖悉必聞媛方娠帝不自安密語侍
讀張說曰用事者不欲吾多子奈何命說挾劑以入帝
於曲室自煮之夢若有介而戈者環鼎三而三煮盡覆
以告說說曰天命也乃止生男是為肅宗帝即位為貴

嬪其娣節愍太子妃也初肅宗生卜云不宜養乃命王
皇后舉之后無子撫肅宗如所生後又生寧親公主乃
薨說以舊恩故子埒得尚寧親肅宗即位至德二載太
上皇自蜀詔有司其議尊稱遂上冊諡寶應末祔泰陵
玄宗貴妃楊氏隋梁郡通守汪四世孫徙籍蒲州遂為
永樂人幼養叔父家始為壽王妃開元二十四年武惠
妃薨後廷無當帝意者或言妃姿質天挺宜充掖廷遂
召內禁中異之即為自出妃意者巧藉女官號太真更

為壽王聘韋昭訓女而太真得幸善歌舞邃曉音律且
智算警穎迎意輒悟帝大悅遂專房宴宮中號娘子儀
體與皇后等天寶初進冊貴妃追贈父玄琰太尉齊國
公擢叔玄珪光祿卿宗兄銛鴻臚卿錡侍御史尚太華
公主主惠妃所生最見寵遇而釗亦寢顯釗國忠也三
姊皆美劭帝呼為姨封韓虢秦三國為夫人出入宮掖
恩寵聲焰震天下每命婦入班持盈公主等讓皆不敢
就位臺省州縣奉請託奔走期會過詔敕四方獻餉結

納門若市然建平信成二公主以與妃家忤至追內封
物駙馬都尉獨孤明失官它日妃以譴還銛第比中仄
帝尚不御食咎怒左右高力士欲驗帝意乃白以殿中
供帳司農酒餼百餘車送妃所帝即以御膳分賜力士
知帝旨是夕請召妃還下鑰安興坊門馳入妃見帝伏
地謝帝釋然撫慰良渥明日諸姨上食樂作驟賜左右
不可貲由是愈見寵賜諸姨錢歲百萬為脂粉費銛以
上柱國門列戟與錡國忠諸姨五家等舍聯亘擬憲宮

禁率一堂費緡千萬見它第有勝者輒壞復造務以壞
侈相誇詡土木工食不息帝所得奇珍及貢獻分賜之
使者相銜於道五家如一妃每從游幸乘馬則力士授
轡策凡充錦繡官及治瑑金王者大抵千人奉須索奇
服祕玩變化若神四方爭為怪珍入貢動駭耳目於是
嶺南節度使張九章廣陵長史王翼以所獻最進九章
銀青階擢翼戶部侍郎天下風靡妃嗜荔支必欲生致
之乃置騎傳送走數千里味未變已至京師天寶九載

妃復得譴還外第國忠謀於吉溫溫因見帝曰婦人過忤當死然何惜宮中一席廣為鈇鎖地更使外辱乎帝感動輟食詔中人張韜光賜之妃因韜光謝帝曰妾有罪當萬誅然膚髮外皆上所賜今且死無以報引刀斷一縹髮奏之曰以此留訣帝見駭惋遽召入禮遇如初因又幸秦國及國忠第賜兩家鉅萬國忠既遙領劔南每十月帝幸華清宮五宅車騎皆從家別為隊隊一色俄五家隊合爛若萬花川谷成錦繡國忠導以劔南旗

節遺鈿墮舄瑟瑟璣琲狼藉于道香聞數十里十載正月望夜妃家與廣寧主僮騎爭闌門鞭挺謹競主墮馬僅得去主見帝泣乃詔殺楊氏奴貶駙馬都尉程昌裔官國忠之輔政其息岫尚萬春公主暄尚延和郡主弟鑑尚承榮郡主又詔為玄琰立家廟帝自書其碑銘秦國早死故韓號與國忠貴最久而號國素與國忠亂頗為人知不恥也每入謁並驅道中從監侍姆百餘騎炬密如晝靚粧盈里不施幃障時人謂為雄狐諸王子孫

凡婚聘必先因韓號以請輒皆遂至數百千金以謝初
安祿山有邊功帝寵之詔與諸姨約為兄弟而祿山母
事妃來朝必宴餞結歡祿山反以誅國忠為名且指言
妃及諸姨罪帝欲以皇太子撫軍因禪位諸楊大懼哭
于庭國忠入白妃妃銜塊請死帝意沮乃止及西幸至
馬嵬陳玄禮等以天下計誅國忠已死軍不解帝遣力
士問故曰禍本尚在帝不得已與妃訣引而去縊路祠
下裹尸以紫茵瘞道側年三十八帝至自蜀道過其所

使祭之且詔改葬禮部侍郎李揆曰龍武將士以國忠
負上速亂為天下殺之今葬妃恐反仄自疑帝乃止密
遣中使者具棺槨它葬焉啓瘞故香囊猶在中人以獻
帝視之悽感流涕命工貌妃於別殿朝夕往必為梗欵
馬鬼之難號國與國忠妻裴柔等奔陳倉縣令率吏追
之意以為賊棄馬走林號國先殺其二子柔曰苟我死
即并其女刺殺之乃自剄不殊吏載置于獄問曰國家
乎賊乎吏曰互有之乃死瘞陳倉東郭外

贊曰或稱武韋亂唐同一轍武持久韋亟滅何哉議者
謂否武后自高宗時挾天子威福脅制四海雖逐嗣帝
改國號然賞罰已出不假借羣臣僭於上而治於下故
能終天年阡亂而不亡韋氏乘夫淫烝于朝斜封四出
政放不一旣鴆殺帝引睿宗輔政權去手不自知戚地
已疎人心相挺玄宗藉其事以撼豪英故取若掇遺不
旋踵宗族夷丹勢奪而事淺也然二后遺後王戒顧不
厚哉

唐書卷七十六

唐書卷七十六考證

太宗文德順聖皇后長孫氏傳河南洛陽人○舊書作
長安人

父晟仕隋為左驍衛將軍○舊書右驍衛將軍晟之女
從幸九成宮方屬疾會柴紹等急變聞帝甲而起后輿
疾以從○臣德潛按后從幸九成宮屬疾此貞觀八

年事也本紀無急變事柴紹傳亦然此未詳何指應
有誤

中宗庶人韋氏傳數改制度陰儲人望○

臣德潛

按上

文乃神龍三年以後事也而綱目在神龍元年

唐書卷七十六考證

謹案卷七十六第一頁後三行六芳儀刊本脫芳
字據舊書增

第二十四頁後一行終右領軍衛將軍刊本脫衛
字據舊書后妃傳及職官志增又父瓌刊本瓌
訛環據本書公主傳改


第二十五頁後七行昔高祖時天下歌桃李子刊
本脫子字據舊書增

第二十五頁後八行高宗歌側堂堂刊本脫側字

據舊書及本書五行志增

第二十七頁後一行父庭芝刊本庭訛延據本書
上官儀傳改

第二十九頁後二行曾祖抗父孝謹自有傳按竇
誕少子孝謹舊書附見竇威傳及外戚竇德明
傳新書竇威傳竇懷貞傳及外戚傳並刪孝謹
此云孝謹有傳誤



總校官庶吉士臣侍朝

校對官中書臣孫希旦

謄錄監生臣張起隆

欽定四庫全書薈要

史部

唐書卷七十八



詳校官編修臣王天祿

欽定四庫全書薈要卷五千二百十七

史部

唐書卷七十七

宋端明殿學士宋祁撰

列傳第二
后妃下

肅宗廢后庶人張氏鄧州向城人家徙新豐祖母竇昭
成皇后女弟也玄宗幼失昭成母視姨鞠愛篤備帝即
位封鄧國夫人親寵無比五息子曰去惑去疑去奢去

逸去盈皆顯官去盈尚常芬公主去逸生后肅宗為忠
王時納韋元珪女為孺人既建太子以孺人為妃后為
良娣妃兄堅為李林甫構死太子懼請與妃絕毀服幽
禁中安祿山反陷于賊至德中薨始妃既絕良娣得專
侍太子慧中而辯能迎意傳合玄宗西幸娣與太子從
度渭民郭道乞留復長安太子不聽中人李輔國密啓
娣又贊其謀遂定計北趣靈武時軍衛單寡夕次娣必
寢前太子曰暮夜可虞且捍賊非婦人事宜少戒對曰

方多事若倉卒妾自當之殿下可徐為計駐靈武產子
三日起縫戰士衣太子敕止對曰今豈自養時邪乾元
初冊拜淑妃贈其父尚書左僕射姊妹皆封號弟清潛
尚大寧延和二郡主遂立為皇后詔內外命婦悉朝光
順門后能牢寵稍稍豫政事與李輔國相倚多以私謁
撓權親蠶苑中羣命婦相禮儀物甚盛二年羣臣上帝
尊號后亦諷羣臣尊已號翊聖帝問李揆揆爭不可會
月蝕帝以咎在後宮乃止又與輔國謀徙上皇西內端

午日帝召見山人李唐帝方擁幼女顧唐曰我念之無怪也唐曰太上皇今日亦當念陛下帝泣然涕下而內制於后卒不敢謁西宮帝不豫后自箴血寫佛書以示誠初建寧王倓數短后於帝上皇在蜀以七寶鞍賜后而李泌請分以賞戰士倓助泌請故后怨卒被譖死繇是太子深畏事后謹甚后猶欲危之然以子伋早世而侗幼故太子得無患寶應九年帝大漸后與內官朱輝光等謀立越王係而李輔國程元振以兵衛太子幽后

別殿代宗已立羣臣白帝請廢為庶人殺之清潛與舅
竇履信皆流放支黨伏誅

肅宗章敬皇后吳氏濮州濮陽人父令珪以郾丞坐事
死故后幼入掖廷肅宗在東宮宰相李林甫陰構不測
太子內憂鬢髮斑禿後入謁玄宗見不悅因幸其宮顧
廷宇不汛掃樂器塵蠹左右無嬪侍帝愀然謂高力士
曰兒居處乃爾將軍叵使我知乎詔選京兆良家子五
人虞侍太子力士曰京兆料擇人得以藉口不如取掖

廷衣冠子可乎詔可得三人而后在中因蒙幸忽寢厭
不寤太子問之辭曰夢神降我介而劒決我脅以入殆
不能堪燭至其文尚隱然生代宗為嫡皇孫生之三日
帝臨澡之孫體孱弱負姆嫌陋更取它宮兒以進帝視
之不樂姆叩頭言非是帝曰非爾所知趣取兒來於是
見嫡孫帝大喜向日視之曰福過其父帝還盡留內樂
宴具顧力士曰可與太子飲一日見三天子樂哉后性
謙柔太子禮之甚渥年十八薨代宗即位羣臣請以后

祔肅宗廟乃追尊為皇后上諡合葬建陵啓故窆貌澤
若生衣皆赭色見者嘆異謂有聖子之符云

代宗貞懿皇后獨孤氏失其何所人父潁左威衛錄事
叅軍天寶中帝為廣平王時貴妃楊氏外家貴冠戚里
祕書少監崔岫妻韓國夫人以其女女皇孫為妃妃生
子僖所謂召王者妃倚母家頗驕媚諸楊誅禮浸薄及
薨后以姝艷進居常專夜王即位冊貴妃生韓王迥華
陽公主大厯十年薨追號為皇后上諡帝悼思不已故

殯內殿累年不外葬後三年始詔於都左治陵欲朝夕望見之補闕姚南仲諫而止乃葬莊陵詔宰相常袞為哀冊帝於后厚故送終華廣務稱其情袞極道悽婉以中帝意又詔羣臣為挽辭帝擇其尤悲者令歌之初后愛遇第一官其宗叔卓少府監兄良佐太子中允

代宗睿真皇后沈氏吳興人開元末以良家子入東宮太子以賜廣平王實生德宗天寶亂賊囚后東都掖廷王入洛復留宮中時方北討未及歸長安而河南為史

思明所沒遂失后所在代宗立以德宗為皇太子詔訪
后在亡不能得德宗即位乃先下詔贈后曾祖士衡太
保祖介福太傅父易直太師弟易良司空易直子震太
尉一日封拜百二十七人詔制皆錦翠地飾以廐馬負
載賜其家易良妻崔入謁帝易服召王韋美人出拜詔
崔勿答建中元年乃具冊前上皇太后尊號帝供張舍
元殿具袞冕出自左序立東方羣臣在位帝再拜奉冊
欵欵感咽左右皆泣於是中書舍人高叅上議漢文帝

即位遣薄昭迎太后于代今宜用漢故事令有司擇日分遣諸沈行州縣物色咨訪以述宣皇帝孝思意冀上天降休靈命允荅須審知皇太后行在然後遣大臣備法駕奉迎帝乃以睦王述為奉迎使工部尚書喬琳副之并平公主侍起居使者分行天下故中官高力士女頗能言禁中事與女官李真一嘗從后游李見高疑問之含糊不堅而年狀差似后又后嘗削脯哺帝傷左指高亦嘗剖爪傷指是時宮中無識后者於是迎還上陽

宮馳以聞帝喜羣臣皆賀力士子知非是具言其情詔貸之帝謂左右吾寧受百罔冀一得真於是自謂太后者數矣及索驗左皆辭窮終帝世無聞焉貞元七年詔贈外高祖琳為司徒封徐國公為立五廟以琳為始祖詔族子房為金吾將軍奉其祀憲宗即位有司建言皇太后沈氏厭代二十有七年大行皇帝至孝哀思罔極建中時發明詔遣使者奉迎凡舟車所至罔不逮歲推月遷叅訪理絕請因大行皇帝啓殯詔羣臣為皇太后

發哀肅章內殿中人奉廬衣置幄坐宮中朝夕上食告
天地宗廟上太皇太后諡冊作神主祔代宗廟備法駕
奉禕衣納于元陵祠室詔曰可

德宗昭德皇后王氏本仕家失其譜系帝為魯王時納
為嬪生順宗尤見寵禮既即位冊號淑妃贈其父遇揚
州大都督子姓姻出悉得官貞元三年妃久疾帝念之
遂立為皇后冊禮方訖而后崩羣臣大臨三日帝七日
釋服將葬后母邲國鄭夫人請設奠有詔祭物無用寓

欲祭聽之於是宗室王大臣李晟渾瑊等皆祭自發塗
日日奠終發引乃止葬靖陵置令丞如它陵臺立廟奏
坤元之舞敕宰相張延賞柳渾等製樂曲帝嫌文不工
李紆上諡冊曰大行皇后帝又謂不典並詔翰林學士
吳通玄改撰冊曰咨后王氏然議者謂岑文本所上文
德皇后冊言皇后長孫氏為得禮永貞元年改祔崇陵
德宗賢妃韋氏戚里舊族也祖濯尚定安公主初為良
娣德宗貞元四年冊拜賢妃宮壺事無不聽而性敏淑

言動有繩矩帝重之後宮莫不師其行帝崩自表留奉
崇陵園元和四年薨

順宗莊憲皇后王氏琅邪人祖難得有功名於世代宗
時后以良家選入宮為才人順宗在藩帝以才人幼故
賜之為王孺人是生憲宗王在東宮冊為良娣后性仁
順宮中化其德莫不柔雍順宗即位疾已繇頓后侍醫
藥不少怠將立后会病棘而止憲宗內禪尊為太上皇
后元和元年乃上尊號曰皇太后后謹畏深抑外家無

豪絲假貸訓厲內職有古后妃風十年崩年五十四遺
令曰皇太后敬問具位萬物之理必歸於有極未亡人
嬰霜露疾日以衰頓幸終天年得奉陵寢志願獲矣其
何所哀易月之典古今所共皇帝宜三日聽政服二十
七日釋天下吏民令到臨三日止宮中非朝暮臨無輒
哭無禁昏嫁祠祀飲食酒肉已釋服聽舉樂侍醫無加
罪陪祔如舊制有司上諡葬豐陵

憲宗懿安皇后郭氏汾陽王子儀之孫父曖尚昇平公

主實生后憲宗為廣陵王聘以為妃順宗以其家有大
功烈而母素貴故禮之異諸婦是生穆宗元和元年進
冊貴妃八年羣臣三請立為后帝以歲子午忌又是時
後廷多嬖豔恐后得尊位鉗掣不得肆故章報聞罷穆
宗嗣位上尊號皇太后贈暖太尉母齊國大長公主擢
兄釗刑部尚書鉞金吾大將軍后移御興慶宮凡朔望
三朝帝率百官詣宮門為壽或歲時慶問燕饗後宮戚
里內外婦車騎駢壅環珮之聲滿宮帝亦豪矜朝夕供

御務華衍侈大稱后意后嘗幸驪山登覽裴回詔景王
督禁甲從帝自到昭應奉迎留帳飲數日還帝崩中人
有為后謀稱制者后怒曰吾效武氏邪今太子雖幼尚
可選重德為輔吾何與外事哉敬宗立號太皇太后寶
歷倉卒后召江王嗣皇帝位是為文宗文宗性謹孝事
后有禮凡羞果鮮珍及四方奇奉必先獻宗廟三宮而
後御之武宗喜畋游角武林擇五坊小兒得出入禁中
它日問后起居從容請曰如何可為盛天子后曰諫臣

章疏宜審覽度可用用之有不可以詢宰相母拒直言
勿納偏言以忠良為腹心此盛天子也帝再拜還索諫
章閱之往往道游獵事自是畋幸稀小兒武抃等不復
橫賜矣宣宗立於后諸子也而母鄭故侍兒有曩怨帝
奉養禮稍薄后鬱鬱不聊與一二侍人登勤政樓將自
隕左右共持之帝聞不喜是夕后暴崩有司上尊諡葬
景陵外園太常官王皞請后合葬景陵以主祔憲宗室
帝不悅令宰相白敏中讓之皞曰后乃憲宗東宮元妃

事順宗為婦歷五朝母天下不容有異論敏中亦怒周
墀又責謂皞終不撓墀曰皞信孤直俄貶皞旬容令懿
宗咸通中皞還為禮官申抗前論乃詔后主祔于廟

憲宗孝明皇后鄭氏丹陽人或言本爾朱氏元和初李
錡反有相者言后當生天子錡聞納為侍人錡誅没入
掖廷侍懿安后憲宗幸之生宣宗宣宗為光王后為王
太妃及即位尊為皇太后太后不肯別處故帝奉養大
明宮朝夕躬省候焉懿宗立尊后為太皇太后咸通三

年帝奉后宴三殿命翰林學士侍立結綺樓下六年崩移仗西內上諡冊葬景陵旁園

穆宗恭僖皇后王氏越州人本仕家子幼得侍帝東宮生敬宗長慶時冊為妃敬宗立上尊號為皇太后贈后父紹卿司空母張追封趙國夫人文宗時稱寶歷太后太和五年宰相建白以太皇太后與寶歷太后稱號未辨前代詔令不敢斥言皆以宮為稱今寶歷太后居義安殿宜曰義安太后詔可會昌五年崩有司上諡葬光

陵東園

穆宗貞獻皇后蕭氏閩人也穆宗為建安王后得侍生
文宗文宗立上尊號曰皇太后初后去家入長安不復
知家存亡惟記有弟帝為訪之俄有男子蕭洪因后姊
壻呂璋白見之太后謂得真弟悲不自勝帝拜洪金吾
將軍出為河陽三城節度使稍徙鄜坊始節度自神策
出者舉軍為辦裝因三倍取償洪所代未及償而死軍
中併責償於洪洪不許左軍中尉仇士良憾之會閩有

男子蕭本又稱太后弟士良以聞自鄜坊召洪下獄按
治乃代人詔流驩州不半道賜死擢本贊善大夫寵贈
三世帝以為真不淹旬賜累鉅萬然太后真弟庸輒莫
能自達本紹得其家系士良主之遂聽不疑歷衛尉卿
金吾將軍會福建觀察使唐扶上言泉州男子蕭弘自
言太后弟御史臺叅治非是昭義劉從諫又為言請與
本辯有詔三司高元裕孫簡崔郇雜問乃皆妄本流愛
州弘儋州而太后終不獲弟初太和中懿安太后居興

慶宮寶歷太后居慶安殿后居大內號三宮太后帝每
五日問安及歲時慶謁率繇複道至南內羣臣及命婦
詣宮門候起居有司獻四時新物送三宮亦稱賜帝曰
上三宮何可言賜遽索筆滅賜為奉開成中正月望夜
帝御咸泰殿大然燈作樂迎三宮太后奉觴進壽禮如
家人諸王公主皆得侍武宗時徙積慶殿又號積慶太
后大中元年崩上今諡

穆宗宣懿皇后韋氏失其先世穆宗為太子后得侍生

武宗長慶時冊為妃武宗立妃已亡追冊為皇太后上尊諡又封后二女弟為夫人有司奏太后陵宜別制號帝乃名所葬園曰福陵既又問宰相葬從光陵與但祔廟孰安奏言神道安於靜光陵因山為固且二十年不可更穿福陵崇築已有所當遂就臣等請奉主祔穆宗廟便帝乃下詔朕因誕日展禮于太皇太后謂朕曰天子之孝莫大於承續今穆宗皇帝虛合享之位而宣懿太后實生嗣君當以祔廟繇是奉后合食穆宗室

尚宮宋若昭貝州清陽人世以儒聞父庭芬能辭章生
五女皆警慧善屬文長若莘次若昭若倫若憲若荀莘
昭文尤高皆性素潔鄙薰澤靚妝不願歸人欲以學名
家家亦不欲與寒鄉凡裔為姻對聽其學若莘誨諸妹
如嚴師著女論語十篇大抵準論語以韋宣文君代孔
子曹大家等為顏冉推明婦道所宜若昭又為傳申釋
之貞元中昭義節度使李抱真表其才德宗召入禁中
試文章并問經史大誼帝咨美悉留宮中帝能詩每與

侍臣賡和五人者皆預凡進御未嘗不蒙賞又高其風操不以妾侍命之呼學士擢其父饒州司馬習藝館內教賜第一區加穀帛元和末若莘卒贈河內郡君自貞元七年祕禁圖籍詔若莘總領穆宗以若昭尤通練拜尚宮嗣若莘所職歷憲穆敬三朝皆呼先生后妃與諸王主率以師禮見寶歷初卒贈梁國夫人以鹵簿葬若憲代司祕書文宗尚學以若憲善屬辭粹論議尤禮之太和中李訓鄭注用事惡宰相李宗閔譖言因駙馬都

尉沈蟻厚賂若憲求執政帝怒幽若憲外第賜死家屬徙嶺南訓注敗帝悟其讒追恨之若倫若荀早卒庭芬男獨愚不可教為民終身

敬宗貴妃郭氏右威衛將軍義之子失義何所人長慶時后以容選入太子宫太子即位為才人生晉王普帝以早得子又淑麗冠後廷故寵異之踰年為貴妃贈義禮部尚書兄環少府少監賜大第文宗立愛晉王若已子待妃禮不衰亡其薨年

武宗賢妃王氏邯鄲人失其世年十三善歌舞得入宮中穆宗以賜潁王性機悟開成末王嗣帝位妃陰為助畫故進號才人遂有寵狀纖頰頰類帝每畋苑中才人必從袍而騎校服光侈略同至尊相與馳出入觀者莫知孰為帝也帝欲立為后宰相李德裕曰才人無子且家不素顯恐詒天下議乃止帝稍惑方士說欲餌藥長年後漫不豫才人每謂親近曰陛下日燎丹言我取不死膚澤消槁吾獨憂之俄而疾侵才人侍左右帝熟視

曰吾氣奄奄情慮耗盡顧與汝辭答曰陛下大福未艾
安語不祥帝曰脫如我言柰何對曰陛下萬歲後妾得
以殉帝不復言及大漸才人悉取所常貯散遺宮中審
帝已崩即自經幄下當時嬪媛雖常妬才人專上者返
皆義才人為之感慟宣宗即位嘉其節贈賢妃葬端陵
之栢城

宣宗元昭皇后薨氏不詳其世少入邸最見寵答及即
位以為美人大中中薨贈昭容詔翰林學士蕭寔銘其

寔具載生鄆王萬壽公主後夔昭等五王居內院而鄆
獨出閤及即位是為懿宗外頗疑帝非長寘出銘辭以
示外廷乃解帝追冊昭容為皇太后上尊諡詔后二等
以上親悉官之配主宣宗廟自建陵曰慶陵置宮寢
懿宗惠安皇后王氏亦失所來咸通中冊號貴妃生普
王七年薨十四年王即位是為僖宗追尊皇太后冊上
諡號祔主懿宗廟即其園為壽陵后屬總以上帝悉官
之

懿宗淑妃郭氏幼入鄆王邸宣宗在位春秋高惡人言
立太子事王以嫡長居外宮心常憂惴妃護侍左右慰
安起居終得無恙生女未能言忽曰得活王驚異之及
即位以妃為美人進拜淑妃女為同昌公主下嫁韋保
衡保衡處內宅妃以主故出入娛飲不禁是時譁言與
保衡亂莫得其端僖宗立保衡緣它罪為人所發且汙
舊謗卒貶死妃猶處禁中黃巢之難天子出蜀倉卒妃
不及從遂流落閭里不知所終

懿宗恭憲皇后王氏其出至微咸通中列后庭得幸生
壽王而卒王立是為昭宗追號皇太后上諡祔主懿宗
室即故葬號安陵召后弟瓌官之景福初瓌位任瀋重
帝亦以外家倚之為中尉楊復恭所媚表為黔南節度
使瓌之鎮道吉栢江復恭密喻楊守亮覆其家

昭宗皇后何氏梓州人系族不顯帝為壽王后得侍婉
麗多智恩答厚甚既即位號淑妃從狩華州詔冊為皇
后光化三年帝獵夜歸后遣德王還邸遇劉季述留王

紫廷院明日季述等挾王陳兵召百官脅帝內禪后恐
賊臣加害天子即取璽授季述與帝同幽東宮賊平反
正天復中從帝駐鳳翔李茂貞請帝勞軍不得已后從
御南樓會朱全忠逼帝東遷后謂帝曰此後大家夫婦
委身賊手矣涕數行下帝奔播既屢威柄盡喪左右皆
悍逆庸奴后侍膳服無須臾去側至洛帝憂忽忽與后
相視無死所已而遇弑哀帝即位尊為皇太后宮中不
敢哭徙居積善宮號積善太后帝將禪天下后亦遇害

初蔣玄暉為全忠邀九錫入喻后度不免見玄暉垂泣
祈哀以母子託命宣徽使趙殷衡譖於全忠曰玄暉等
銘石像瘞積善宮將復唐全忠怒遂遣縊后以醜名加
之廢為庶人

唐書卷七十七

唐書卷七十七考證

肅宗章敬皇后吳氏傳生代宗為嫡皇孫生之三日帝
臨澡之孫體孱弱負姆嫌陋更取他宮兒以進帝視
之曰非爾所知趣取兒來于是見嫡孫帝大喜向日
視之曰福過其父帝還盡留內樂宴具顧力士曰可
與太子飲一日見三天子樂哉○

臣德潛

按玄宗紀

開元二十五年廢皇太子瑛二十六年立忠王璵為
皇太子代宗紀開元十四年十二月十三日生于東

都之上陽宮則代宗之生先于肅宗為太子十有三
年也烏得云一日見三天子預稱太子耶且其事亦
不經其譌顯然

順宗莊憲皇后王氏傳十年崩年五十四。舊書元和
十一年三月崩于南內之咸寧殿綱目亦同舊書

憲宗懿安皇后郭氏傳宣宗立於后諸子也帝母鄭故
侍兒有曩怨帝故奉養禮稍薄后鬱鬱不聊與一二
侍人登勤政樓將自隕左右共持之帝聞不喜是夕

暴崩○沈炳震曰舊書云宣宗繼統即后之諸子也
恩禮愈異于前朝兩書互異

穆宗恭僖皇后王氏傳太和五年宰相建白以太皇太
后與寶歷太后稱號未辨云云○舊書在太和八年

唐書卷七十七考證